

Oppløftande avslutning på sesongen.

15.06.2011



Bjørnen sover, men det varer ikkje så lenge...(Foto: Thor Inge Døssland)

Skulemusikken hadde tirsdag kveld siste øvinga for sesongen. I den anledning hadde dei invitert foreldre, søsken og andre til å vera med på ei uformell kosestund siste timen. Dei som vart til stades fekk oppleve eit optimistisk korps som går til ferie, og både styret og musikantar gjev dirigenten Tor Skeie Olsen mesteparten av æra for at stemninga er så god. Heldigvis er han klar for ein ny sesong med korpset.

Etter 17. mai kom seks aspirantar inn i korpset, og denne kvelden bidrog dei for første gang med musikalske innslag saman med korpset. Det bestod i musikk og enkel dramatisering framført på ein svært festleg måte. Aller mest imponerte dei yngste som berre hadde vore med på nokre få øvingar. Dirigenten batt det heile fint og humørfyllt saman samtidig som han rosa musikantane og fortalde litt om korleis korpset har jobba siste tida. Han syntest og det var inspirerande å oppleve det gode frammøtet av foreldra.

Det var kjekt å vera publikum, og det var ikkje vanskeleg å leggja merke til at både dei eldste og dei yngste musikantane kosa seg i lag!! Ansiktsuttrykka fortalde alt om det!



Det var rikeleg servering (Foto: Thor Inge Døssland)

Etter musikkinnslaga var det klart for litt kos med kaffi, kaker, sjokolade og saft. Ros til styret og dirigent som spontant bestemte seg for dette tiltaket.

Til helga kjem så aller siste post på programmet denne sesongen. Lørdag reiser nemleg ein tropp på 19 til Bergen for å ha ein koseleg dag saman.

Det har vore svært godt frammøte, og den gode stemninga avspeglar seg og i at alle som er med i korpset no truleg er klar for ein ny sesong til hausten. Det er og godt håp om at det også kjem fleire i tillegg.

Det er kjekt å følgja med på det gode grunnarbeidet som vert gjort i skulemusikken no. Dersom vi er tålmodige vil det garantert gje gode resultat!!

Av Thor Inge Døssland